

We aues ganz anders chunnt

Im Waud isch wider mau aues drunger u drüber gange.... was für ne Hektik! Wie jedes Jahr hei sech d'Waudtier riisig gröit uf Wiehnachte. «Uhhh, isch das schön...scho gli chöme aui miner Liebschte cho z'hopple», seit z'Häsli ganz ufgregt. Ja, das isch immer wider ä grossi Sach gsi, we d'Waudtier aui ihri Liebschte, Familie, Verwandti u Fründe ilade zur grosse Waudwiehnachte....was für nes Feschtl!



Z'Eichhörnli het wi wiud Nüssli putzt. Schlussamänd söue di Nüssli ja richtig glänze. Äs isch scho ä chli Stouz druf gsi, das äs di glänzigste Nüssli vom Waud het gha. Dr Fuchs het ä chli mitleidvou dr Chopf geschüttlet u derbi dankt: «Di Nüssli si doch nid besser weme die uf Hochglanz poliert... so viu fürigi Zyt wetti ou mau ha». Är het aues ä chli gmütlecher gno. Ja, dr Fuchs het sech haut scho immer aus dr Schlauscht agluegt. Z'Rehli het pischtet wi nes Ross... äs het immer nume weni Tannezweigli mitenang chönne i z'Muh näh. Ä so isch äs hin und här glüffe... u het derbi veiächli gschtöhnet. Dr Igu isch wie jede Morge ä chli chratzbürschtig ungerwägs gsi. Är het ufem Waudbode viu feini Sache gfunge u het die aui ufene Hufe treit. U z'Häsli isch fröhlech umenang gümperlet aus wärs immer no jung u knackig. Äs het Wurze, Chnolle u schüschi auerlei pflanzig heitreit.



Dr Uhu het wi immer ä chli «d'Oberufsicht» gha über däm ganze Tribe u het – je nachdäm – no letschti Awisige ghä. «He Rehli, Du bisch guet nache... Nimms ä chli gmütlech». Uf sim Hochsitz het är ä seehr guete Überblick gha, so das ihm nüt entgange isch: «He Fuchs», meint dr Uhu, «übertue Di de nid, gäu». Aui hei grad schnäu ihri Arbeit ungerbroche u i Richtig Fuchs gluegt. Uiiiiii, das isch de em Fuchs scho grad ä chli piinlech gsi, u är het grad sofort meh Gas ghä.



Aber äbe... mir wüesses ja aui: Mängisch chunnt aues ganz anders oder wie z'Häsli öppe seit: «Dr Mönsch dankt u Gott länt». Em Vorabe vo Wiehnachte het's wie us Chüble gränet. Dr Fluss isch über d'Ufer trätte u het dr Boumschtamm, wo für d'Tier aus Brügg het dienet, wäggschwemmt. Dr Uhu het's aus erschte gseh u het di trurigi Nachricht sine Fründe mitteilt: «Üsi Verwandte chöi nid cho Wiehnachte fiire, wüu's dr Boumschtamm wäggschwemmt het». Äs isch mucksmüsli stiu worde. Z'Rehli het grad nümme möge säge. «Oh nei», het z'Eichhörnli mit Träne i de Ouge gseit. «Ä so ne Seich...» het dr Igu gfutteret u dr Fuchs het ä chli besserwüesserisch gmeint: «Ilg ha's ja immer gwüsst, das das mau passiert». Ä trurigi Schtimmig het sech da breit gmacht. Niemer het me möge rede.



Da chunnt plötzlech z'Häsli cho z'hopple: «Vilech isch das ja d'Glägeheit üsi Waudwiehnachte mau viu besinnlecher z'gschtaute?». Ä chli ratlos hei di angere z'Häsli gmuschteret. «Itz chöi mir üs i auer Ruch uf z'Wäsentleche konzentriere. We mer ehrlech si wüsse mir doch vor luter Hektik gar nimm genau, um was das es a Wiehnachte eigetlech geit». Itz het sech dr Fuchs us sire Schtarri erhout u fragt ä chli zynisch: «U was söu de bitte nach Dire Meinig z'Wäsentleche a Wiehnachte si? Das mer ä chli tüe umehange?».



«Nei, sicher nid» meint z'Häsli. «Mir fiire a Wiehnachte d'Geburt vo Jesus Christus. Gott het üs so fescht gliebt, das är si Sohn uf di Wäut geschickt het, ä so das we mir a ihn gloube z'ewige Läbe wärde ha! Är het üs mit sim Sohn Versöhnig u Liecht wöue i di Wäut bringe... Wiehnachte isch ä Freudetag!». Ganz verzückt vor Fröid het z'Häsli ä Luftsprung gmacht. «Liecht?» seit z'Eichhörnli... «de chönnte mir doch äs riisigs Füre mache?... u de chönnt ig ja mau ä chli miner Nüssli röschte?». Ä chli rumpusurig seit dr Igu: «Ilg chönnt ja wider mau ä Wiehnachtsgschicht vorläse... so wie ig's früecher aube gmacht ha... we Dir das weit». «Ou ja» meint z'Häsli... «u de chöi mer ja ou wider mau ganz schlicht nume Cherze azünde u jedes cha säge für was das es wott dankbar si». U itze si di Ideene nume no so usegschprudlet.



Di chlineri Fiir het aune ganz guet gfaue. Aui si sech ä chli nöcher cho. Ä schöni, rüehgi, fridlechi Schtimmig isch ufcho. Aues isch ä chli bewusster ufgno worde. U aui si sech einig gsi: Ä so ne besinnlechi, schöni Wiehnachte hei mir scho lange nümme gha!

